

B R A S I L I A.

dis auribus, brevi cauda, reliquo corpore cinereo: eadem lucifugæ sunt, nec nisi noctu ad pabulum prodeunt. *Cotias* vero nominant, magnitudine & forma & sapore leporum: rufo colore, parvis auribus, cauda fere nulla. Majores sunt ejusdem fere speciei, quas *Pacas* vocant, rostro & facie felis, fusco colore, candidis maculis interstincto: neque carne tantum, sed & corio ipso prætenere. Cæterum insolito spectaculo *Tatusiæ* sunt, ad porcelli magnitudinem, corio squamatim loricato, adeo ut equi cataphracti speciem reddant: ex eo caput duntaxat, more testudinum exerunt, pedibus contractis, specubus ferme, uti cuniculi sese continent. Illud vero mirum in Cerigonibus, ex cujus alvo duæ pendent manticæ, in quibus catulos circumferunt. Valde etiam inusitata & effigie & natura est animal, quod ab re ipsa Lusitani *Pigritiam* appellant, rostro fædo, & unguibus ad digitorum similitudinem prominentibus.

Populi nullos omnino colunt Deos, ominibus tantum & auguriis ad insaniam dediti. Viri, feminaeque nudi incedunt, robusti, fluxo à vertice duntaxat capillo: nam cæteras corporis partes identidem depilant. Gregatim peregrinantur, ordine simplici, silentio miro, virum uxor anteit. Vino & frumento in hæc usque tempora caruere, sativa radice victitantes in farinam redacta, quam *Mandiocam* appellant. Sub eodem tecto, ad inversæ modum carinæ, prælongo, multæ simul familiæ degunt: noctu

ad noxia vitanda animalia, cubant in retibus supra terram suspensis: vivunt in diem, & quicquid habent, in commune facillime conferunt, nihil in posterum solliciti. Natandi arte ad miraculum usque excellunt. Captos in prælio hostes egregia multorum dierum cura saginatos, ingenti cum tripudio mactant, vorantque tota verubus membra. Ex eadem provincia in Europam traducuntur plurimæ merces, magna ambari copia, balsamum præstantissimum, lignum Brasiliium, ad tingendos pannos expetitur; tobacum, & plurimum gingiberis.

Capita, celebratioresque urbes hujus provinciae duæ sunt: Prior *S. Salvador* sive *Bahia de Todos los Santos*, in qua tam Episcopus, quam Gubernator cum reliquis ministris regis domicilium habet. Eam paucis retro annis Federati Belgii populus, sumtibus Societatis Indicæ, armata manu expugnavit, annumque circiter tenuit, usque dum obsessa denuo ab Hispanis, pristini juris facta fuit. Altera urbs *Olinda* vocatur, in Pernambuci Capitania sita, arcibus duabus valida, munitaque. Hanc quoque ejusdem Societatis armis anno 1630, audaci facinore, ducibus Lonckio & Waardenburgio, cepimus, & in hunc usque diem servamus victores, ut jam signa sua victricesque aquilas non solum ad orientem, verum etiam ad occidentem in Novo Orbe circumferant Batavi, aliique ejusdem belli adversus regem Hispaniarum socii.

*Urbes à
Belgis
per expu-
gnatae.*

